

而江上儒生通文呈疏舉措駭恠請首倡人停舉捧疏承旨推考希泰之罪亦令禁府重勘前府使具聖任之向來一疏極為駭妄特教譴罷而曾未幾何復有收叙之命其沉痾黨習不識義分之罪不可薄罷旋叙宜寢其命上并允之獨具聖任事不允○吏曹因江原道御史韓顯謩書啓言安峽縣監申義集旌善郡守宋必煥平昌郡守崔昌億狼川縣監李道載不治可罷也鐵原府使閔思淵高城郡守朴弼琦安峽前縣監洪重耆治績宜分等論賞上允之○辛丑夜有氣如火光於坤方○命自今筵中稟定者書以榻前定奪筵席下教書以榻前下教俾為式○右議政趙文命因平安監司狀聞請依新定禁令義州潛越銀被捉者朴東華之罪依本律勘斷上允之文命又言武弁有金鑄者剛明綜覈臣弟顯命亦謂之可試於地部惠廳故臣言于吏曹除地部郎而曹吏胥動浮言使渠呈遞銓堂亦許之故臣自備局啓請仍任而及其出謝也一承宣又言其不宜行公至欲還給肅單云承宣事固可訝不能用此人亦可惜也上曰承宣之斥退肅單甚不當也仍命推考令該曹促鑄出仕史臣曰趙文命荷隆恩位輔相曾不能進賢退不肖而顧乃以一金鑄拂拭至煩上聞未知鑄何等才諛然亦可謂察小而遺大矣○兵曹判書金在魯言本曹